

En retard cun las premias a las cassas da malsauns

Tge pon e duessan las vischnancas far en tals cas?

■ **(anr) Il maun public sto impunder onn per onn milliuns per premias e custs a cassas da malsauns che na vegnan betg pajads dals segirads. L'onn passà han be ils chantuns stuì surpigliar premias da cassas da malsauns na pajadas en l'import da 42 milliuns francs.** Tar chantuns cun in pool da datas (glista) da quels ch'èn en retard culs pajaments è quai auter. Lur vischnancas han endrizza in case-management per vegnir cun ils segirads uschè lunsch ch'els adempleschan lur obligaziuns.

En blers chantuns paja il maun public 85% da las pretenziuns (scrits da sperdita) ch'ins n'è betg vegnì dad incassar era cun stumar ils segirads. I sa tracta qua da premias a las cassas da malsauns na pajadas en l'import da milliuns. Quellas personas han uschia vinavant la pussaivladad da vegnir tractadas. En chantuns cun quest pool da pajaders en retard n'è quai betg pussaivel. Ils segirads pon vegnir tractads be per cas d'urgenza. Il medem mument mainan quellas vischnancas cun success in case-management per appellar als segirads da pagar.

Gia enconuschan divers chantuns quel model. Uschia vul ins

impedir ch'il maun public stoppia pagar assegs da sperdita a las cassas da malsauns. Quai case-management è pia ina investiziun che sa paja. L'experiencia musa ch'ins po spargnar cun quel sistem blers daners tras cuntanscher che numerusas personas pagan dad ellas anor las premias a las cassas da malsauns. En ina vischnanca da la Turgovia han ins gi 2012 pli che 500 tals cas. Quai avess custà passa in milliun ad ella. Cun case-management èsi dentant anc restà 150 000 francs. Quai ed auter scriva l'Associaziun da vischnancas svizras en sia revista.

Cun il case-management vegn appellà consequentmain als segirads da pagar lur premias a las cassas da malsauns. Quai entschaivia cun als registrar en il pool da datas e suspender las prestaziuns. Spitals e medis han invista e san ch'igl è da tractar be en cas d'urgenza. Mo il case-management po dar liber da tractar entirmain. La vischnanca è pia gidaivla che las premias vegnian puspè pajadas dals segirads e las prestaziuns da las vischnancas sminuidas.

I na constat betg che mo tals na pagan betg las premias che pu-

dessan dentant far quai. Quai è adina ina dumonda da lur prioritads. Suentar il fit-chasa vegn pir la cassa da malsauns. Vitiers vegnan era problems da relaziuns, dischoccupaziun u difficultads cun la sanadad che laschan crescher il culm da daivets.

Na mintga cas finescha positivamain. Savens manca era la cooperaziun da restituir e pagar las premias segund cunvegna. Na en urden èsi dentant ch'igl è previs che las cassas da malsauns ston restituir be 50% da la summa dals scrits da sperdita pajads, fertant che las vischnancas ston pagar 100%.

Igl è tuttina impurtant da tractar quels che pagan cun retard lur premias cun respect. Per blers èsi fitg malempernaivel da discurrer davart lur difficultads finanzialas. Tras il case-management cun il pool (glista) da quels ch'èn en retard cun ils pajaments èsi pussaivel da reglar la chausa a lung termin senza che las vischnancas stoppian pagar summas immensas a cassas da malsauns. I na dastga dentant betg esser uschia ch'i n'haja naginas consequenzas sch'ins na paja betg las premias a las cassas da malsauns.